



MC Mary Kom lenisüba nung oversight committee inyaksangshitsü

UNSC nung India permanent züngsem akümtsü UK-i pusemer

## BJP Kohima-i SA-II menden meshir

**Kohima, January 23, 2023 (TYO):** Kohima nunga tanga BJP district unit tem den külemi BJP Kohima District-i State unit office kima nung lungkak aitba sentong ka agiogo.

Parnokisa parnok candidate ka nem Assembly menden ka agütsütsü takhangba agütsüogo. "2018 küm taoba BJP state president Visasolie Lhoungu-i High Command tetuyuba tashi angaa pa indang Northern Angami-II A/C menden toktsü. Iba ya NDPP den menden lemsaba lemtet ajanga liasü" ta State BJP office, BJP Kohima district president Khrielie Usou-i ashi.

BJP-i Assembly Constituency 6 nungi asem nungbo takok angutsü teimla lir aser iba jagi menden lemsaba nung BJP nem menden kabosa agütsütsü asüngdang, ta BJP Kohima-i ashi.

Parnoki Southern Angami-II A/C menden meshir aser iba nung NDPP MLA Zale Neikha lir. Taoba NPF MLA Kropol Vitsu-i küm ka shi jembitepa arur ita ka tejaklen BJP nung aden aser pai iba menden nungi toktepnür.

SA-II BJP Mandal ya Kohima district nung mandal tajungtiba lir aser tesüiba ita ishika tsüngda constituency nung BJP membership 3000 tema kümogo aser iba jagi Party candidate ka nungdaker, ta Kropol Vitsu-i ashi.

State yimtiba ama BJP indang MLA alitsüla. Menden magütsüra BJP Kohima district-i National aser State Party lennirtem dang nungi kuli meshitsü aser nungdakra onok ajunga party nungi anentsü renema lir, ta paisa metetdaksü.

Tanü BJP karyakartas-i "We the BJP Kohima district deserve the BJP Party ticket", "As a karyakarta it is our right to ask and demand for the winnable candidate", "Let the Lotus bloom in Kohima region... we will win it", "We the BJP Kohima district totally support and endorse Er Kropol Vitsuy SA-II as the party candidate from Kohima" amala tezülubatem amer lungkak ait.

BJP Kohima district-isa State BJP president nem shidi ka agütsü aser ibaji National BJP president aser tanga central lennirtem dangia yokogo.

## SC-i Nagaland sorkar dang DGP shimba sangdong agütsütsü tuyur

**New Delhi, January 23, 2023 (Agencies):** Supreme Court-i Hombarnü Nagaland sorkar dang Director General of Police (DGP) inyaksü atema IPS ketdangsur Rupin Sharma shimba indang tetuyuba hopta ka tsüngda agütsütsü tetuyuba agütsüogo.

Union Public Service Commission (UPSC)-i IPS ketdangsurtemi DGP inyaksü atema küm 30 mapa inyaker alitsüla ta asubaji küm 25 ta melentsü atema asüngdangba nung ametter Nagaland sorkari SC dangi temepishiba shidi ka zülü saka Chief Justice D Y Chandrachud aser Justice V Ramasubramanian o Justice J B Pardiwala na adenba bench-i ibaji magizük.

IPS ketdangsurtem indang küm 30 nungi küm 25 akümtsübaji UPSC aser Union

Ministry of Home Affairs ajanga dang inyaksü akok ta SC bench-i ashi.

Nagaland ama state tila nung küm 30 tashi inyaker IPS ketdangsurtem angutsü kanga tasak ta Nagaland sorkari SC dang ashi.

"Rupin Sharma ya Nagaland DGP shimogo aser iba ama mapang ka nung onoki UPSC pusema küm 30 nungi 25 akümtsü indang tetuyuba magütsür" ta SC bench-i telangzüba agütsüogo.

"Iba ajanga küm pungu agi teküpokba ketdangsur ka DGP akümtsü aser ibaji okadaki angateta lir" ta parnokisa ashi.

SC bench-isa Nagaland sorkar dang hopta ka tsüngda 1992-batch officer Rupin Sharma DGP shimba sangdong agütsütsü atema tetuyuba agütsü.

## Liphanyan nung RCC bridge meshitettsü

**Dimapur, January 23, 2024 (TYO):** January 12, 2023 nü bangjemtepba ama NFHRCC-i January 28, 2023 nü Governor's Camp Liphanyan nung 2 lane RCC bridge meshitetba sentong ka agütsü.

2013 küm Naga CSOs-i sarasadema aser lumia iba Naga otsüsütsü mapatong tenzüka liasü. Anungji Tsüngrem nem tenüngsang agüja aser iba mapa

nung yaritepertem ajak tenüng sanga Nagaland nung alirtem nem bendanga agütsütsübaji onok indang teinyaksü lir, ta NFHRCC-i sangdong ka nung metetdaksü.

Dimapur nung amenoka aliba kin hohotem aser tongti kin hoho ajaki iba sentong nung adentsü atema teshimtet nübotem yoktsü mepishia metetdaksür, ta NFHRCC-isa ashi.

## Eastern Nagaland MLA temi NLA election nung shilem agütsü

**Dimapur, January 23, 2023 (TYO):** Eastern Nagaland Legislator's Union (ENLU)-i Nagaland general election 2023 nung shilem agütsü osang metetdaksüogo.

ENLU-i 14 buba NLA election nung shilem magütsü bangzüng renema lir aser January 22, 2023 nü ENLU rongdak senden ka nung iba onük jembiteper, January 18, 2023 nü ECI-i election agütsü osang

sangoktsüogo anungji shilem agütsü ta MLA temi bangjemtep ta sangdong ka nung metetdaksü.

ENLU-i agütsüba sangdong nung 13 buba NLA nung Eastern Nagaland nungi MLA 20 prongi sign süa lir.

Züngsem 60 agi akümbe Nagaland Legislative Assembly nung Eastern Nagaland nungi MLA 20 lir.

Eastern Nagaland People's

Organization (ENPO)-i district 6-Mon, Tuensang, Noklak, Shamator, Kiphire aser Longleng lokteper 'Frontier Nagaland' ta ser state ka akümtsü akhangter.

ENPO-i Eastern Nagaland nung kin hoho ajak dang assembly election nung shilem magütsü tetuyuba agütsüogo.

State balaka meshiba magütsüra election nung shilem magütsü aser mokdangtsü ta ENPO-i tetuyuba agüja lir.

## Congress-i Rio-BJP sorkar aitsür; atsüngdoktsü ayonger

**Kohima, January 23, 2023 (TYO):** BJP den yaritepa Neiphu Rio-i aniba teloktep sorkar kübok ochimashi, ashioktsüba, tamajung tebilemba aser maangka bushiba maparen masadangteter aser joko tatemang tongogo ta AICC media coordinator Mahima Singh-i ashi.

Mahima Singh ya Nagaland Assembly election atema Congress media in-charge lir aser tanü Congress Bhavan nung osangbener den jembidang iba ya metetdaksü.

"India ya loktiyimten linük ka lir saka Centre nung BJP sorkari tanga state tem nung public-i shimtetertem mezüngmeshir aser Nagaland nung Rio-i aniba sorkari iba nung yariteper anungji yangia iba mesükba ataloktsü akok" ta lai ashi.

2007 nung Congress-i Centre sorkar yimsü asü dang Meghalaya, Manipur aser Tripura state tem den külemi Nagaland high court atema lung azüng. Tanüngba North East state asem nung 2013 nung iba mapa renemogo saka Nagaland nungbo High Court ka angutsü tiyazü teimla ka nung lir" ta Mahima-isa ashi.

Chief Minister Neiphu Rio'er teloktep sorkar nem Rs 70

Crores tashi senotsü lemezüktsüogo saka tang tashi High Court building mangur, ta laisa shisem.

Tang tashi nung high court indang basic structure merenem saka Rio'er sorkari iba mapatong nung electrification aser water supply atema Rs 44.24 crore agizükogo, ta Mahima-i metetdaksü.

Külen, Judges Bungalow atema Rs 22.42 crores agütsü saka iba atema tesem lemezükja mali, ta lai ashi.

"CM Rio-i küm aika tejaklen tebilemstü khuret bena menden toktsür alitsüba sernung pai aniba sorkari maneni public sen auyazüka agir aser külen Enforcement Directorate ajanga Rio anema bushisüngdang" ta Mahima-i ashi.

2023 nung Nagaland nung alirtemi NDPP aser parnok madak tashiyim inyaker BJP atsüngdoktsüla, ta laisa ayongzük.

Congress ya tangatetba aser movement ka lir aser onok indang alizüngji Constitution of India nung ajemdaker lir. Congress-i linük nem preamble agütsü saka BJP-i ibaji anogoshia raksatsür, ta Mahima Singh-i ashi.

"Ozü lennir Rahul Gandhi-i

Kanyakumari nungi Kashmir tashi yatra ka agir aser pai tan ita Kashmir atongtsü aser idakji linük wako atsükettsü" ta laisa shisem.

"Linük nung mapa mangur, jenjang tupet atur, ochimashi lir aser tetsür temeten mali. Item ajak atema Congress-i nübertem den külemi noktaker aser iba ya BJP-i aniba Centre sorkar anema lir. Onoki elections nung takok angutsü mesüra mangutsü akok saka onoki Nagaland ya Assam, Manipur, Goa, Maharashtra aser Madhya Pradesh ama mekümdaktsütsü, kechiyong item state nung BJP-i public-i shimtetba nung tim masüba inyakogo" ta lai metetdaksü.

"Taküm Nagaland assembly elections atema Congress indang candidate 37 lir saka election indang official notification anguba sülen ang tenüngtem metetdaksütsü" ta NPCC working President Khriedi Theinuo-ia ashi.

Paisa kasa tangatetba aliba aser secular political party temi Congress den yariteptsü aser Nagaland nung tang aliba sorkar atsüngdoktsü atema mepishia metetdaksü.

Nagaland State election nung Congress nungi tetsür candidate tem lir, ta Theinuo-isa shisem.

## BJP Forum Nagaland-i menden kasasa alemtsü akhangter



BJP ticket amer toktepnüba candidate aser parnok pusemertemi Super market area nung lungkak aitba sentong ka agiba angur. (Dimapur, January 23)

**Dimapur, January 23, 2023 (TYO):** BJP Forum Nagaland-i Hombarnü NDPP aser BJP tsüngda menden 40:20 lemsaba magizüker aser kasa lemsatsüla ta takhangba agütsüogo.

Assembly constituency 10 nungi BJP ticket amer toktepnüba bilemba candidate tem den parnok pusemertemi Super market, Dimapur nung lungkak aitba sentong ka agi.

NDPP aser BJP tsüngda menden 40:20 lemsaba ya meshitak aser party anaprong menden kasasa lemsatsüla mesüra BJP-i constituency 60 prong nung tokteptsüla ta parnoki takhangba agütsü.

Dimapur II A/C nung BJP

nungi toktepnüba bilemba candidate Sobu Jamir-i menden 40:20 lemsaba aitsü.

"Onoki menden 30:30 mesüra 60 aginür. NDPP lennirtemi asüngdangya mesüi BJP lennirtem nem tetuyuba magütsütsüla. BJP nem pei candidate shimtsü maongka agüjang" ta pai ashi.

"Lennirtem shimba nung ochishia meinyaker aser lenisüba ya senmanga marur. Naga nungeri ibala pei bilemba dang inyakba mapa magizüktsüla" ta Sobu Jamir-isa ashi.

Onoki akhangba ama meinyakra onok kija ser tokteptsü kechiyong onok dak tashi peria lir. Onoki constituency ka atema dang masü saka state ajunga

atema lungkak aiter, ta paisa shisem.

Taoba MLA aser BJP nungi toktepnüba bilemba candidate Naiba Konyak-ia ashiba agi "Onoki küm aika BJP party atema anibelem arema inyaka arur, saka mapangtong nung tejak tasen nem BJP ticket agütsüba ajang party züngsemtem temlung yirutsü."

Central BJP lennirtemi NDPP den menden lemsaba ya agientsüla mesüra 30:30 agi melentsüla, ta paisa metetdaksü.

Deputy Chief Minister Y Patton aser State BJP president Temjen Imna Along Longkumer nati BJP central lennirtem den jembitsü nangzükogo ta Naiba Konyak-isa ashi.

# Governor Mukhi-i NIT Nagaland convocation moatsü



Chumoukedima Town Council Hall nung January 23, 2023 nü National Institute of Technology (NIT) Nagaland pur 4 buba convocation sentong agidang Governor, Prof. Jagdish Mukhi-i moaja liasü.

**Dimapur, Aenjeti/January 23 (TYO):** Chumoukedima Town Council Hall nung January 23, 2023 nü National Institute of Technology (NIT) Nagaland pur 4 buba convocation aliba sentong nung Nagaland aser Assam indang Governor, Prof. Jagdish Mukhi-i moaja liasü.

Iba sentong nung jembidang, linük nung NITs 31 lir aser NIT Nagaland ya state nung centrally funded technical institute mezüngbuba alitsü, ta Prof. Mukhi-i ashi.

Reju tem aser shisatsü ajungba nung terenlok amendaka lir ta Ato Kilonser Narendra Modi-i ashiba onük athishia jembidang, NIT Nagaland ajanga engineering, technology, education aser research tsütsü NIT Nagaland yagi shilem tulu agir, ta pai ashi.

North East region nung

kanga kera renloka aoba NITs tem rongnung NIT Nagaland ya ka lir aser NITs ya technical education kistüng ajungkettsü asoshi masü saka meimchir yimya liru aser United India mangdang nung putu tasen temaba jenjangi ajungkettsü nükjidong nung amenok, ta Governor Prof. Jagdish-i ashi.

4 buba Convocation nung degree angur ajak dang Governor-i onük pungo nung temolung agütsütsü lemsatep aser itemji - alinük tasazük agi nü career aser takum soita meyudaksütsüla aser alima ya nü asayadak moabu ka südaktsütsüla; graduate asür ajak dang pei nübur, linük aser meimchir asoshi mapa tajung inyaksü; jila aser yimtsüngtem tsüngta terenlok sako südaktsütsü aser iba atema NIT Nagaland nung graduate asürtemi tesem tezü nung

alirtem dangi technology amshia sendakteptsü ayongzük; aluyimba tsütsü technology tasen aser tajungba agüja tajungba nung züsentetsü aser graduate asür ajak dang mapa bushir masü saka mapa agütsür asütsü ayongzüka liasü.

Mukhi-isa graduate asürtem dang iba degree ya tatem ka ama mereprangtsü saka shisatsü maneni bushiba nung ajungmesor ka südaktsütsü ayongzüka liasü.

Tetsür kati ayatirm nung shinga metsüboi hon amer yimtung nung jajatetra idangji ang asenok nüji tia nguogo ta asenoki amangtsü, ta Mahatma Gandhi-i ashiba o pai lephshia shia liasü.

Alima nung tetsür ka kija ayatirm nung jajatetba yimtung ishika lir aser item rongnung Nagaland ya ka lir, ta Governor-isa ashi.

# Kaketshir nem merenshia kaket malidaktsütsü tuyur

**Dimapur, Aenjeti/January 23 (TYO):** School kar nung Text Book tem jenjang tasakba agi ayokba indang School Education Department-i angazüker. Anungji iba ama tim masüba mapa inyakba nungi pila alitsü metetdaksür, ta School Education Department sangdong ka ajanga ashi.

Ano school telungzük nung

kaket, stationery aser uniform tem ayoktsüsa anepalua lira item oset ya yangji lapoka aliba dokan nungi alitsü asoshi k a k e t s h i r / t s ü r a p u r memerenshitsüla.

Ajidang masü ano danga dokan tem nungi item oset alitsü asoshia school-i t s ü r a b u r / k a k e t s h i r m e m e r e n s h i t s ü l a /

majungshitsüla.

Iba totuyuba nung aibelenba School Heads/ Management nem tapet temerenshi agütsütsü. DEOs/ Sr. SDEOs/SDEOs temi tapi agi pei jurisdiction kübok school tem ajungbena semdangtsü aser shia aliba totuyubatem sülen anidakdaksütsü, ta sangdong ajanga ashi.

# Power Department-i tasen shima aliba ketdangsür nem training agütsü

**Dimapur, Aenjeti/January 23 (TYO):** Power Department ajanga tang tasen shima aliba Officer (Sub Divisional Officer pezü aser Junior Engineer 35) nem Orientation-cum-Training agüja liasü.

Department inyakyim aser nükjidong tali tejangjaba nung metetjemdaksütsü nükjidong nung iba sentong ya ayongzüka liasü.

Sentong mezüngbuba shilem agidang Er. Moa Aier, Engineer-in-Chief (Power) ajanga Officer tem dang temolung agüja pei mapa shidak inyaka service

tajungtiba nung agütsütsü aser kasa mapang revenue bendenba nung temolung agütsütsü ajungshia liasü.

Er. Tiameren Walling, Chief Engineer (D&R) ajanga Officer tem dang pei mapa inyakba mapang tayingzükba balala ajurutsü renema alitsü ashi aser revenue ketdangsüba mapang ochishia inyaksü ayongzüka liasü.

Chief Engineer (T&G), Er. Penrithung Yanthan-ia parnok dang Department tashi itshitsü aser nüburtem tajungtiba nung tenzüksü asoshi Orientation-cum-Training nung temolung

agütsütsü ajungshia liasü.

Orientation-cum-Training mapang parnoki Power Transmission aser Generation Station tongtipang tem semdanga liasü. Parnok ya working division balalai anir oa yangji Operation & Maintenance aser Revenue inyakyim indang sayua liasü.

Iba sentong ya January 11, 2023 nü tenzük aser January 20, 2023 nü tembanga liasü.

Iba training tatem anogo nung Officer tasentemi pei tajangshibatem lemsatep aser Engineer-in-Chief, Er. Moa Aier ajanga melepzüng o jembia liasü.

# Mejangjaba nisung tasü mang ka nguteta lir

**Dimapur, Aenjeti/January 23 (TYO):** Dimapur nung aliba fly over bridge kübok Traffic Zone-I Office anasa lenmang tezülen non-local tebur arishi küm 50 shi tasü mang ka January 23, 2023 nü nguteta liasü.

Ozüng agi melaba ama maparen ajak tembanga sülen

tasü mang ya PM examination/ jangjatetsü asoshi District Hospital Dimapur Morgue nung bener oa lir.

Kibur/kinunger/tembar temi Officer-in-Charge, East PS Dimapur (Contact no.7085055020) den tongteprateptsü akok.

# Mokokchung jila nung sorkar mapa inyaker ajak Republic Day nung adentsü metetdaksür

**Dimapur, Aenjeti/January 23 (TYO):** Deputy Commissioner, Mokokchung, Shashank Pratap Singh ajanga Mokokchung jila kübok sorkar tenzük ajak dang sangdong ka nung ashiba agi, January 26, 2023 nü 74 buba Republic Day ya akhi ama anepdang 8:40 ako nungi tenzük Imkongmeren Sports Complex, Mokokchung nung

alitsü. Anungji sorkar tenzük ajak iba sentong nung arua adentsü totuyuba agütsür, ta sangdong ajanga ashi.

Maneni District Head of Offices ajanga pei staff indang attendance agir Deputy Commissioner Office nem agütsütsüla, ta kasa sangdong ajangasa ashi.

# CHSS Dimapur nung ananü tesayur training agütsü



**Dimapur, Aenjeti/January 23 (TYO):** Christian Higher Secondary School Dimapur nung January 20-21, 2023 anogotem Teachers' Workshop and Skills Enhancement training agia liasü.

Iba sentong nung shisalen sayur ya Dokina Das, Dr Kekonino Zhünyü Asst. Professors (Mt. Mary College of Teacher Education, Chümoukedima) den Lion Manisha Ghanti (International Trainer, Lions Quest) nungertem liasü.

Parnoki 'Professional Ethics, Inclusive Education, Constructive Approach, Language in Curriculum,

Understanding Child Psychology Addressing common classroom problems and their remedies in Nagaland context, Methodology of teaching Science and Mathematics, Social and Emotional Learning (SAEL) aser Four Phase Lesson Design' amala onüktem nungi tesayurtem nem shisa agüja liasü.

Asen shisaliok tajungba kumdaksütsü asoshi tesayur nem lenmang balala nungi teyari agütsüba atema shisalen sayur, Lions Club Dimapur aser Leo Club Dimapur nungertem dang kanga pelar, ta CHSS administration ajanga sangdong ka nung ashi.

# DC Kohima ajanga Arms License alirtem dang metetdaksür

**Dimapur, Aenjeti/January 23 (TYO):** 14 buba Nagaland Legislative Assembly atema aruya aliba General Election mechi aser district nung tesunep alitsü mechi Kohima District kübok arms license alir ajak dang pei prangbong den injang aser arms license tem pei aliba anasa Police Station nung January 31, 2023 tashinung oa yutsütsü metetdaksür, ta Deputy

Commissioner & District Magistrate, Kohima, Shanavas C IAS ajanga sangdong ka nung ashi.

Iba totuyuba sülen manidaker tem indang Arms License (s) agientsütsü aser ozüngi melaba ama tapet temerenshi alitsü, ta ashi.

Police station indang Officer-in-charge ajanga anogoshi osang agütsütsüla, ta kasa sangdong ajangasa ashi.

# DC & DEO Kohima ajanga 'requisition order' agütsü

**Dimapur, Aenjeti/January 23 (TYO):** Home Department, General Administration Branch ajanga taoba mapang metetdaksüba ama aser Representation of Peoples Act 1951 indang Section 160 kübok tashi agüja aliba amshia, aruya aliba 14th Nagaland Legislative Assembly Elections 2023 dak sendakba nung gari meshiba anententsü atema Kohima

smart City kübok Old NST nung aliba Multi-Level Car Parking amshitsü tuyur, ta Deputy Commissioner aser District Election Officer Kohima, Shanavas C IAS ajanga sangdong ka nung metetdaksü.

Iba tesem ya January 23, 2023 nungi tenzük election inyakyim metembang tashi 'Election Urgent' ama amshitsü, ta sangdong ajanga ashi.



January 23, 2023 nü Bihar yimtiba, Patna nung Netaji Subhas Chandra Bose sor küm 126 ajungba anogomong nung kaketshirtemi Netaji kürakyanglu anasa asür nem akhüm agütsüba noksa nung angur.

### Kerala kübok Ernakulam nung tanur ana dak Norovirus putet

**New Delhi, January 23 (Agencies):** Kerala nung nisung ana dak Norovirus putetba sülen iba wara prokba nokdangtsü atema Kerala kübok Ernakulam district nung anogo asemnü school ajak shibangtsü tuyuogo aser maneni kaketshirtem dak iba tashidak tendangdar.

Ernakulam district nung Class 1 nung azünger tanur ana dak norovirus putet aser kaketshirtem aser tsürabur 62 dak iba tashidak temaitsü lir.

Hombarnü Kerala health department-i Ernakulam district nung tanur ana dak norovirus putetba osang sangdong. Class 1 nung azünger tanur ana tebok aoba den külemi saaktsüba sülen tenaprong temang tendanga samples tendangba ajanga norovirus positive puteta

liasi. "Norovirus" ajanga kanga saaktsüdaaktsür aser tebok aoer; iba wara ya melamela menateper aser kanga bulua proker.

Iba tashidak dang ya 'winter vomiting bug' taka ajar.

World Health Organization (WHO)-i ashiba agi, küm shia alima nung arrshi küm 5 ser tekübok tanur million 200 densema nisung million 685 (crore 68.5) dak norovirus puteter aser küm shia tanur 50,000 densema nisung lakh 2 shi asür.

Norovirus keta alir ka dak iba tashidak melamela menazüker, iba virus menazüka aliba osettsüset nung nü teka agi kongshiba sülen tebang nung kongshiba, mesüra iba virus menazüka aliba chiyungtsü achiba mesüra tzü ajemba

ajanga menazüksüa akok.

Norovirus keta aliba temaitsüji ghonda 24 nungi ghonda 72 tsüngda meteter, ajisüaka iba dang nungjagi talangba temaitsüji lira nai tekaraba nung medical teyari bushitsüla. Talisa scü nung azü densema ora tekaraba nung medical teyari bushitsüla.

Ano nisung kar dakbo iba tashidak keta liaka temaitsü khenyongi memeteter, saka parnok jagi tangar nem menazüksütsü akok.

Norovirus keta aliba temaitsütem rongnung-saaktsünüba, saaktsüba, tebok ashiba mesüra angoba, teboklang ashiba, tebok aoba mesüra tzü ama aoba, temang tera metabata, tekolak menüba aser temang ngoyangoshiba densema lir.

### UNSC nung India permanent züngsem akümtsü UK-i pusemer

**New Delhi, Aenjeti/January 23 (Agencies):** United Nations Security Council (UNSC) nung India permanent züngsem akümtsü atema United Kingdom-i pusemer, ta Hombarnü British High Commissioner, Alexander Ellis-i metetdaksü.

"Iba institution (UNSC) nung temelenshi benoktsüji kanga tasak, ajisüaka ibaji kanga nungdak. UN aser UNSC ama telok kar World War II sülen tenteta liasü, iba sülen World Trade Organization (WTO) ama telok kar tentet, aser iba institution (UNSC) ano tajaungba akümtsü atema India nungi imlar," ta paisa metetdaksü.

Paisa International Financial Institutions (IFI) atishia jembi. IFI ya Organisation for

Economic Co-operation and Development (OECD) nungi tenteta liasü.

Ellis-i, asenoki asetkong linüktem nungittsü nungdak, ibaji ajanga parnoki alima nung temelenshi bener arutsütettsü, aser iba atemaji meranga inyaktsüla, ta ashi

Yaküm December 1 nü India-i UN Security Council (UNSC) presdiency agizüka liasü. Iba council nung India kümsük ana atema züngsem shima lir.

December 14 nüa UK-i UNSC nung India permanent züngsem shimtsü atema pusema liasü.

Iba mapang nungji UK Permanent Representative to United Nations, Dame Barbara Woodward-i, "Tangartemia (tanga linüktem)

ashiba ama Security Council nung ano züngsem tali anioktsüla, aser mapa talangka nungi UK-i Council nung permanent aser non-permanent categories ulushitsü atema jembi arur, aser tan hopta nung UK Foreign Secretary-i yimjak nung iba ya lephsia jembiogo. Onoki Brazil, Germany, India aser Japan permanent züngsem shimtsü atema pusemer," ta metetdakja liasü.

UN Security Council ya talisa alima nung tesünep aser security alitsü atema tentetba telok lir.

1946 küm UNSC tentetba sülen tang council nung permanent züngsem ponguji China, France, Russian Federation, United States aser United Kingdom lir.

### Pelaba Lemsateper



19.06.1938 - 28.11.2022

Onoki teti meima aser akhumtsüba aliba tsürabur **Late. Imnala** la akümüli arishi tempanger teti tatem makadak lima nung alitsü tebu Tsüngrem dangi aoba anogo tashi nung kija aser lokti balalai kinungertem den tamang sarasadem aser rongsen agi yaritepa atema kanga pelaba lemsateper.

1. Settsu Baptist Arogo
2. Settsu Village Council
3. Kohima Ao Baptist Arogo
4. Settsu Senso Telongjem Kohima
5. Kohima Settsutsur Telongjem
6. Settsu Fellowship Kohima
7. Er. Supongliba & Family
8. Kohima Molungkimong Senso Telongjem
9. Kohima Molungkimongtsur Telongjem
10. Chandmari Youth Meet V KABA
11. Upper PWD Youth Organisation Kohima
12. PWD Prayer Fellowship Kohima
13. E-in C (Estt. Br) NPWD Kohima
14. Kohima Harvest Church (Mhonkhola)

Iba den kija kibongtem kwikati onok mangyim jashi tia nung alidang nübo, rongsen aser sarasadem agi yariogo, nenok ajak dang tepang agi meshitetba tepela lemsateper. Tsüngremi nenok maneni moajangma ta ozü sarasadem.

- Temeim Chirurtem aser Semchirtem.

### Pharmacist tem 'vaccinators' akümtsü atema training agütsütsü

**Nagpur, January 23 (Agencies):** India lima nung yimtsüngtem aser kanga tezülen aliba tesemtem nung doctor tem aser nurse tem maliba tesemtem nung vaccine agütsütsü atema pharmacy dokan kiburtem nem vaccine agütsüba training agütsütsü.

Indian Pharmaceutical Association (IPA)-i program ka tenzükogo aser iba kübok pharmacist nem training agüja 'vaccinators' kümdaktsütsü.

2025 küm tashi nungbo India nung register süa alir pharmacist lakh 12.5 nem training agüja vaccine agütsürtem kümdaktsütsü, aser ibaji ajanga coronavirus ama alima nung wara tamajung balala poktetba mapang nung nisung shilem 25 bosa kümsüktsü.

Taküm May ita nungi tenzüka Pharmacist nem training agütsütsü. Mezüngbuba nung

anogo 15 tashi online ajanga training agütsütsü, iba sülen register süa aliba hospital tem nung offline training agütsütsü, ta Indian Pharmaceutical Association-i metetdaksü.

Training renema agir pharmacist ajak nem IPA-i certificate kaka agütsütsü aser World Health Organisation (WHO) nungia certificate angutsü.

72buba Indian Pharmaceutical Congress (IPC) tatembangbuba sentong alidang osangbenertem den jurila jembidang IPA Tir, Prof TV Narayana-i, IFA-i Centre sorkar matsüngdang iba onük benoka liasü aser sorkari agizükogo, ta metetdaksü.

United States aser United Kingdom ama kanga terenlok aliba linüktem nunga pharmacist nem vaccine agütsüdaaktsütsü atema training agütsür, ta paisa shisem.

### Modi sorkari tarutsü putu atema sentsüh tulu yutsür: Congress

**New Delhi, Aenjeti/January 23 (Agencies):** Centre nung Ato kilonser Narendra Modi-i aniba sorkari tarutsü putu atema sentsüh tulu yutsür, ta aija Congress Party-i, 2014 küm den medemdangra tesüiba küm 9 tsüngda BJP yimsüsüba kübok India nung nisung shia sentsüh 2.5 agi teimba tsükloktsüogo, ta metetdaksü.

AICC otongdar, Gourav Vallabh-i, 2014 küm March 14 tashi nung India sorkar indang sentsühji sen 55. 87 lakh crore liasü, aser taküm March 31 tashi nungbo sorkar sentsühji sen 155. asadangteter, ta metetdaksü.

Paisa, sen apua meliaka India nung shia sentsühji sen 1,09,373 asütsü; 2014 küm nungbo nisung shia sentsühji

43,124 dang liasü, ta metetdaksü.

Vallabh-i, India nung takartiba shilem 5 ket kija nung linük rongsen shilem 60 dak tema lir aser linük nung tekübokba jenjang nung alir nütsüng shilem 50 ket nung linük rongsen shilem 3 dang lir, ta metetdaksü.

Paisa, iba denji medemdangra GST saru (Goods & Service Tax) nungi sarutetba sen 14.83 lakh crore nungi saru shilem 64 bo linük nung tekübokba jenjang nung alir nütsüng shilem 50-i agütsüba lir, ta metetdaksü.

"Tesüiba küm 9 tsüngda sentsüh kechiba kanga tali bendenlokar sorkari telangzüba agütsütsüla," ta Congress lenirisa metetdaksü.



Republic Day Parade 2023 atongtsü anogo ishika dang lia January 23, 2023 nü Kartavya Path, New Delhi nung Republic Day Parade atema 'full rehearsal' agiba noksa nung angur.



## TIR YIMYIM YIMOBILEM (EDITORIAL)

DIMAPUR SANGTENNÜ, AENJETI (JANUARY) 24, 2022

### Anüdoklen nübor o yimsüsür na !

**N**agaland nung tang agitsüba election ya Nagaland anüdoklen alirtem asoshibo yimten telok o telok na tsüngda masü saka nübor tem o tang yimsü tesüdak tatartem na tsüngda tokteper amai ka kümogo. Nübor temibo parnok nem Nagaland nungi razüka state balaka magütsü tashi tang aliba Nagaland state kübok liabo election nung shilem magitsü ta aiben kanga sashia metetdaksüba asenoki angashir. Ajisüaka, Eastern Nagaland nungi tang yimsü tesüdak yimsüsür parnok metsüpronglai yakanü parnokbo Election Commission-i election agitsü sentong sangdongadoker asünungji, election nung shilem agitsü ta lemtetogo. New Delhi-i repranga lia iba tongpang nung nokdaksüba yabo telok anaprongla asoshi dang masü saka Naga nunger inti asoshi topur majung asütsü. Atangji, Naga nunger lushi sendaktepa aliba tashi nung alirtem tashibo ajak Naga yimten ka kübok linür. Ibaji akhidang nungi asenok tejangraba lir. Kasaji Nagaland akümnü nungi jembipet jembir. Ajisüaka, asenok tejangraba o libaliro na balala, kechiyong asenoki külemibo linür saka putepa melitetter. Asenok ajaki Naga nunger ajak ya kibong ka chir ta meteta lir, saka kati ka taoba ta meimtepa melitetter. Naga nungertemi Naga nunger lenitsü yimsüsürtem shimtetter saka yimsüsürtemi terenlok mapatem agi nübor tem longjema alitsüsa meinyaktsür. Iba jagi balaka Naga nunger rongnung temulung mechitep tuluka adoka lir. Terenlok mapa ya nübor tem tajangzük angutsü asoshi dang masü saka terenlok mapa agi nübor tem sendaktepdaktsür, anungji pei lima agi pei nümadangteta longjema litetter. Ajisüaka, Naga nunger yimsüsürbo ajak pei yim aser pei constituency nübor tem yutsür Dimapur nung dang rongsen bendena alitsü merangra, iba jagi anüdok o anülulen na alirtem sendaktepdaktsütsü melen tepila-ang piladaktsütsü. Aji oda, Dimapur aser Kohima na nungi külen Mon aser külen Noklak tashi gari lenmang danga temenungratsüka jungjunga yanglu asübo, iba kisung jagi Nagaland nung alirtem tangatetba nung ka kümer lila. Ajisüaka, tangbo Dimapur o Kohima na tsüngda dena lenmang meyanglutet ajokshir asünungji, shiba danganga kechi mashi, Naga nunger timatemer. Naga nunger aikati terenlok mapa ajak Dimapur aser Kohima nung dang inyaker ta jembiba ya Dimapur aser Kohima mangurtemi jembir südi ta bilemer, kechiyong yimti ana nung yaa kecha balaka terenlok mapa inyakba mangur. Atangji, Dimapur nung state stadium ka yanglupeter yuja lir aser Kohima nung medical college aser high court na merenemtet ajokshidagi aser Mokokchung nungbo kechi aliar memeteta. Ajisüaka, tanü Nagaland nung gari lenmang agidang masü saka power supply agia Dimapur aser Kohima nungi oagi Longwa aser Pangsha tashiji anüa kodanga mair amai tesangwa agütsütetsüsa aser light tashi amshia mapa inyaktetsüsa agütsür alika asübo, ashiko, Frontier Nagaland issue ya melila. Aji oda, Tuesang nung medical college lapoka ali asübo aser Mon nung Engineering college lapoka ali asübo, iba jagi Nagaland anüdok aser anülulen ajak ka kümer anogo shia lanurtem shisaluyim dak ajurutepla. Ajisüaka, Dimapur nung aser Kohima nunga item shusaluyim dak maka nung, koda ser tanga tesemtem nung asenoki lapoktetsü. Tanü Naga nunger meputepba ya meputepnüba agi masü saka kidang kibong nung tsürabur majungba agi tanurtem meputepdaktsütet ama, Naga nunger yimsüsürtemi nübor tem meima tere lok mapa agi nübor tem sendaktepdakja meinyaktetba agi nübor tem rongnung mulungmechitep aser tenükmerem shisatsü adokdaksüogo. Aji oda, tang Nagaland anüdok alirtemi Frontier Nagaland state tasen ka meshiba ken o ya Nagaland anüdok o anülulen na tsüngda ken o masü saka ibaibo nübor tem o yimsüsürtem na tsüngda jembitsüba ken o lir. Iba ama mapang ka nung, Nagaland anüdok alir nübor tem o yimsüsürtem na tebilember aser tangatetba balala nung aoba yagi tebilember, tangalen masü anüdoklen lir ta sayur.

## OLEMSABANG

### KOBA PARTY ASER SHIBA SHIMTSÜ

- Rev. Ayu, Pastor

Kobala party ka, kobala lenir ka shimtsü iba mapangji tang ya lir. Tesayur Rev. Dr. Wati Longchari yamai züluba ka züngshi, "You throw the meat in any direction - North, South, East and West- the stray dogs in the street jump that side and fight each other. They will go in any direction. They do not think about their future; they don't even think about their siblings..." Tongmelang agi yamai meyipdi, "Anüdoklen, Anüolen, Anüdoklen tip, Anüolen tip leni nai shi yokang. Kibur maliba yimdong nung senzüba azü jagi ilen jagi pungmesoa aotsü aser ngutepa shi jagi rakteptesü. Parnoki tarutsü indang mebilemer, parnoki pei techanu atemaka mebilemer..."

Yimdong Zü kibur mali nung endokinra achitsüba dak alema chiyungtsü mapang shitak nung mangur. Yaseta aliba azü atema tongtambangji (principle) shi telong tuluba nguzüksüba jagi dang lir. Parnok asoshi tarutsü atema kecha tebilember mali, saka tanü tepok asünger asü masü ta asüba jagi dang lir. Asenok rongsenren nüchiso mangu tashi aser libaliro (lifestyle) memelenshi tashi shiruru amai dang alitsü südi. Sen nem anishitaksüba political party, party worker, arogo, lokti tentet aika adokogo. Nagaland nung election mapang shi telong tuluba raktepba mapang tongogo. Naga nunger political ideology ajungaji Delhi nungi koda sür sen teimba angutsü ta asüba jagi dang amai ajiteter. Kasaji party workera koda sür telok balala tenteta vote anaben, asemen, pezüben ayoktsü ta asüba nükjidong dang angur. Yamai dang inyak nung Naga lima tejakleni odi ma?

India ya shilu aikati akümba yimli ka lir. Shilu aika, sobaliba-tamangba yimsü, oshi aika aliba ya Teyanglur Tsüngrem temoatsü aser ajak akhüm tsübuttsüla ta agizüktetba secular party ka shimtsü nungdak. RSSi kümtetba BJP teloki secular India indang mejembir, saka koda Hindu Rashtra yangertsü aji dang jembir. Muslim, Christian telok anogo shi rishikangshir, tenla ki rongdoktsür, sarasadema lia azükba, aser tanü anti-conversion law state 9 nung agizüka benshir, India nung Khristan telok balala foreign account merijang ka shibangtsüogo; missionarytem jubilee mapang India semdangi arunera visa magütsüba arogo nung lenitemi ajuruogo. Parliament nung asemen tashi anti-conversion ozüng benoktsü merangogo aser ano merangdaki ta metet. Naga nunger dak matalokerji kecha masüar ta bilema masü, saka India rangpen nükla nung jembitsüla. BJP-i Hindu yimsüyimpong nung India arakmoka ayutsü meranger aser iba yagi tarutsü nung asen chir, semchir jenjang tamajungbai yoktsü ta nükla nung jembitsüla. BJP ya communal party ka ta Khristan ajaki shitetsüba mapangji tang ya lir.

BJP nem yimsü südaktsü nung dang terenlok angutsü ta jembiba ya kenyongi aitsütsüla. Ajaki metet, BJP yimsüsüba arur India nung unemployment tali, India nunger sen jenjang ajema akümba (1 US dollar@ Rs. 82 kümogo), aser takar-sensaker tali shisanga akümba tenük kuli. Nagaland nung BJP-NDPP yimsüsüba mapang Naga nunger terenlok asoshi kechi inyakteta ali? Kohima aser Dimapur nung mapa kar inyakba dak alaka Nagaland ajunga senzüka yuja lir. Tanü ENPO teloki Frontier Nagaland state akhangba kuli kaji, tang teinyakdak government tashi maitba, lokti ajunga asoshi terenlok mapa meinyaktetba ajanga lir. India nung Nagaland ya corruption nung No.1, health, lokti terenlok ajak nung tamajungtiba state ta sangdongogo. Tzükong aika, town sector balala lenmang-a nüburtemi sen sarutepa yanglua arudagi. Ruling party yimtsüng kar nung community hall mesüra black topping yanglutsüba nungji temulung sür alitsüba masü. Nagaland nung lanur asoshi mapa nungdak, lenmang tajung nungdak, electric nungdak, network tajung nungdak, tzü nungdak, industry nungdak, medical college nungdak, hospital tajung aser kaket rüju tajung nungdak. Itemji inyakteta lir asü masü? High court, stadium, medical college (Kma) asoshi senbo peria agütsü, saka corruption ajanga merenemtet yua lir. Ochimashi ajanga Nagaland nung development mapa Congress, NPF aser NDPP-BJP yimsüsüba mapang meinyaktet. Kecha ochishir yimsüsür asenoki meshimtet ta nütsüng shiai asüngdangtsüla. Asenoki ochishir aser lokti meimer masü, sen shimba ajanga tanü Nagaland teküboktiba jenjang nung lir. Party-i masü ochishir aser lokti meimeri dang terenlok bener arutet ta kuli sayur. Osang kar nung züngshiba agi, tang alima nung Yimdong Zü (Stray Dogs) million 62 shi lir, item rongnung India lima 35-40 million lir. Tetezü Yimdong zü ya India lima teimtiba. Lenisüba tsütsü India lima kanga majungba angur, item rongnung asen Naga nunger tamajungba ano shidi süra asen Aortem tamajungtiba. Yimdong nung senzüba azü ama senzür yimden lenir aser party worker nem manishidaktsüli. Nagaland tejakleni odaktsütsü atema ajak khuret. Ne voteji kanga senti. Ochishir, lokti meimer, mangdang akar shimdi. Sen dak rangloker party meshimli.

**Laishibai ashir, Isaiah 29: 9-10.**

"Nenok mangmangtepang, aser süngmangtepang, nenok sasa tenük pokang, aser tenük poker liang, parnok mesepogo, saka yi agi masü, parnok mangazür saka mejemtzü agi masü. 10Kechiyong Kibubai nenok madak sümanga amua aotsü tanela meküplokttsü, aser ainkartem, nenok tenük shibangja lir, mangdang angur nenok tekolak pai nembangja lir."

Asen Naga nungeri Tsüngrem sentoker Rongsen aser Konang bushi nung Yirusalem nunger ama Tsüngremi asenok merenshidagi. Tangatetsü tim mangateter, tangutsü tim mangur, teratetsü tim merateteter. Asenok kopika yamai okronga alitsü? Arung temulung meyipa Tsüngrem dangi odi. Arung ochi shidi. Arung yanglushidi. Arung Yimdong Zü ama melili.

**Iba Olemsabang nung lemsaba ken-o aser shisatsü ya iba ocet züluri bilember ken-o ama tazünger angateta agitsü mepishir**

# Myanmar Arogoi yimsüsürtem dang Tenla kitem kümzüksü mepishi



Yaküm July 20 nü Amnesty International-i sayaba noksa nung Myanmar nung sepaitemi Kayah state kübok Daw Ngay Ku yimdak Khristan Tenla ki ka rongdoktsür aliba noksa nung angur.

**January 23, 2023:** Myanmar nung Khristan nütsüng teimba aliba tesemtem nung Tenla ki aika amakba sülen linük nung Arogoi yimsüsür sepaitemi ketdangsertem dang linük nung Tenla kitem kümzüksü atema temepishiba agütsüogo.

2021 küm February ita nung sepaitemi democracy sorkar atsüngdokba sülen nungi tenzüka Tenla ki aika raksatsüogo mesüra rongdoktsüogo aser tang tesüsa January 15, 2023 nü Mandalay nung sepaitemi Assumption Tenla ki rongdoktsüogo.

Assumption Tenla ki ya küm 129 tejaklen yangluba liasü.

Arogoi yimjak nung shidi ka ajanga yimsüsürtem dang, "Tekülem kitem aser monasteries ya nüburtemi tesünep bushiba aser tatok meshiba tesemtem lir, ajisüaka tekülem kitem-a amaker," ta metetdaksü.

Iba shidi nungji Yangon nung Cardinal, Charles Bo den Mandalay nung tongti putir Marco Tin Win aser Taunggyi nung tongti putir, Basilio Athai nungeri sign süa lir.

Parnoki, "Kechiba item ama temeshi tesemtem amaker aser raksatsür?" ta asüngdang.

Iba shidi ya January 20, 2023 nü sangdonga liasü.

Arogo lenirtem jagi sepaitemi yimsüsürtem dang, Hague Convention ama International tezüngzüktep balala ajanga tekülem kitem, shisaliok angazükba tesemtem aser taneptsü anguba tesemtem kümzüksü atema shia lir, ta metetdaksü.

"Linük ka ama asenok aneptsü nüngdaker. Taneptsübaji tesendaktep ajanga adoker. Tekülem agiba tesemtem ajanga ajungkettsür aser tesünep angur," ta lenirtemi metetdaksü.

January 15 nü Assumption Tenla ki amakba mapang nung sepaitemi Franciscan Sisters indang convent-a ka rongdokja liasü.

Army aser lisopur telok balala tsüngda raraba ajanga

linük nung dioceses 16 nungi pongu-Loikaw, Pekhon, Hakha, Kalay aser Mandalay kanga mejungi kongshiogo.

Ajisüaka Arogo lenirtemi züluba shidi ajanga Khristan nütsüng teimba aliba tesemtem amakba atema sepaitem nem odiodia tai metongloksür.

Mandalay kübok Chan Thar yimtsüngbo aiben maakogo aser ki 500 dak tema rongdoktsüogo.

Arogo lenirtemi, "Prangpong injang ola süngjemdakjang, asenoki adianu ama ajak longjemer tekülem kitem kümzüksü, linük ka ama aser kasa sensotem ama longjemdi," ta ayongzük.

Myanmar nung mezüngbo sepaitemi sepaitemi yimsüsüba anema longkak aiterem pua liasü saka tangbo lisopur telok balala anema rarar. Talisa Khristan nütsüng aika aliba

regions- Kachin, Kayah, Karen aser Chin state tem aser Bamar nung sepaitem den telok balalai raraba ajanga nüburtem kanga takoksa ngudar.

Sepaitemi anünglen nungi amakba ajanga yim aika samatsüogo aser nisung 23,521 shi tepsetogo, ta osang ka ajanga metetdaksü.

Pope Francis-i mapang shia Myanmar nung rara anentsü aser tai tokteptsü atema ayongzükba den külemi tawa Tenla ki raksatsüba atema aitsüogo.

January 22, 2023 nü Pope Francis-i, "Ni talisa Myanmar atema bilemetsür. Kong linük nung kanga tongtibang Tenla kitem rongnung ka- Chan Thar yimdak Assumption Tenla ki raksatsüogo. Iba Tenla kidang mi senoktsüba sülen raksatsü," ta metetdaksa liasü.

# Yirusalem nung tang mezüng tetsür ka pastor ordain süogo



January 22, 2023 nü Yirusalem nung Sally Azar pastor ordain asü dang tangokba noksa nung angur.

**Jerusalem, January 23 (Agencies):** Alima tesem balala nung Arogo nung tetsürtema tongti shimmer, ajisüaka temeshi lima (Yirusalm) nungbo tang ang mezüng tetsür ka pastor ordain süogo, ta osang ka ajanga metetdaksü.

Amongnü (January 22, 2023) Yirusalem nungi Palestine tsür, Sally Azar tang mezüng pastor ordain süogo. Yirusalem yimti tejenba nung aliba Lutheran Arogo ka nung la pastor ordain asü aser iba sentong nungji linük balala nungi densema nisung noklang aika aden.

Rev. Sally Azar-i, "Nisungtem pelaba ngur ni tepelaba aküm. Arogoi nungita

ni iba mera agiba ya o agi rasaa ashitsü makok," ta metetdaksü.

"Iba ya ajanga tetsür aikati 'iba ya takoktsü' ta teimla angutsü aser tanga Arogotem nunga tetsürtem lenir shimtsü, ta ni imlar. Ano mapang talangka agitsü, ajisüaka Palestine nunga yamai temelenshi lira jangratemtsüka asütsü," ta lai ashi.

Palestinian Territories, Israel aser Jordan nung Khristantem ya minority lir. Yirusalem nung Khristan teimbaka Greek Orthodox aser Latin Catholic Arogotem nungi lir aser item Arogotem nung tetsürtem putir meshimer.

Ajisüaka tesüiba küm ishika tsüngda Protestant Arogotem nungbo tetsürtem aika pastor

# ANO GO ABEN TSÜNGREM DEN

## Ain, Tetsübu Masü

"Kechiyong, Tsüngremi asenok nem tetsübu tanela masü, saka ain aser tazüokba tanela agütsü"

2 Tim 1:7.

Tsüngremi Khristan taküm kati tsübua alitsü ajungshibaji, Pa tsübua alitsü ajungshi ( 2 Kor. 5: 10- 11; Ibri 10: 31) dang ajungshi. Nisung tsübubaji Tsüngrem nungi aruba tetsübu masü. Khristantem asoshi tebilemetsüji nisung tsübubaji lir. Nisung tsübuba jagi Tsüngrem peladaktsütsü nokdang, kechiaser nisung tsübuba nung parnok tashi ajak lalur.

Timoti asangur ka liasü ( 1Tim 5: 23). Pa temang nunga tashi mait liasü. Timoti Paul mapang shia obendangdaki aoba aser rishikangshiba metetta liasü. Pauli Timoti dang nisung tsübubaji Tsüngrem nungi aruba masü, ta ashi. Tetsübui Tsüngremi asenok dang kechi ashi aji Pai asüngdangtsü tsübudaktsütsür. Rishikangshi marudang nai Tsüngrem dang tashi anga lidagi ta bilema alitsü akok, saka kodang rishikangshi aser timtem arudir nai tashi angaa aliba nung nüsasa ratatsü akok. Tetsübu timba memetetba tetsübu lir. Asenok jakdang kechi lir aji asenoki memeteter anungji tetsübu agi asenok puadaksür. Asenok tebilemba agi asenok nangpangdaksür aji asünung asenok tangatetba nüngdaker. Asen meketa kechi inyaker aser kechi ataloker itemji asenoki angatettsü tenüngdaksü. Aji agi, Tsüngremi angatetba ama asenoki angatettsü aser Pai anguba ama asenoki angutsü asoshi Pai asenok nem Tanela Temeshi yok.

Tetsübu agi Tsüngrem dang tashi mangatsüba masü. Tanela Temeshi asenok den ali tashi asenoki tsübua alitsü menüngdak. Tetsübui na alar kümdaktsür, saka na nüji kümdaktsütsü asoshi Yisu aru. Tetsübu nungi anitettsü aser ne nuk lapoktsütsü Tsüngrem dang asüngdangang. Pai ne tia jungkai adoktsüba den nai maneni tashia anga alitsü Pai ain agütsütsü.

shimma arudar. Yirusalem nung aliba Arogotem nung züngsem ishishi dang lir aser item Arogotem jagi schools aser hospitals lapoker.

Tawa Church of Sweden nung tongti putir nungi anisüngzükter, Antje Jackelen-i, "Tesem ajaklen loktiliba nung lenirtemji teburtem lir ajisüaka tang iba sobaliba tentetba ya mera kanga tongtibang ka lir," ta metetdaksü.

Antje Jackelen-isa, "Ni ordain asüba sülen küm 40 dak tema jungogo, anungji 'iba ya tamakoktsü' ta bilemer nisung aika ni ajuruogo. Ajisüaka tangbo parnok tetsürtem aika pastor inyakba aser tongti putir inyakba nguogo," ta ashi.

Middle East nung Lebanon aser Syria nung aliba Arogotem nungbo tetsürtem aika Arogo nung tongti shimogo aser US nunga Palestine tsür ka putir inyaka liasü.

January 22, 2023 nü Sally Azar tebu, Bishop Sani Azar-i la ordain süja liasü.

"Ni yamai süniä liasü, aser iba atema ni tajaba liasü," ta Sally-i ashi.

Pastor ka ama lai Yirusalem nung tekülem sentongtem lenia agiba den külemi bible studies

agitsü aser West Bank kübok Beit Sahour nunga English oshi jembiba Arogotem nung tekülem sentong ketdangüsü agitsü.

Bethlehem aser Beit Sahour nung Lutheran pastor, Rev. Dr Munther Isaac-i, "Iba ya asen Arogo atema kanga tongtibang anogo ka lir, iba ya tejakleni aotsü atema agiba mera ka lir," ta ashi.

Paisa, Lutheran Arogotemi lapokba school tem nung Rev. Sally Azar ya tatishitsü ka ama ni tetshitsü, ta ashi. Item schools nung Khristantem aser Muslim nunger tanurtem azünger.

Rev. Dr Isaac-i Arabic oshi nung Laishiba nung lenir tetsürtem indang kaket ka zülua lir aser paisa tetsürtem pastor shimtsü atema pusema arur.

"Onoki tetsürtem pastor agizükter, onoki tetsürtem professor tem agizükter, onoki tetsürtem nem surgery agidaksür, ajisüaka asenoki tang tashi, tetsürtemi Lai sayutettsü asü mesüra temeshi ketdangüsü agitettsü asü? ta ashishir," ta pai ashi.

"Palestine nunger ama asenok kanga renlokogo, ajisüaka tetsürtem nem tashi aser temeden agütsüba dak sendakba nung ano teinyaktsü aika lir," ta pai ashi.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Oraten**

(adj) asatep, asaprang (noisy)


\*Nübener kidang teti oratena angashir.

**Oratet**

(v) ojang tetetzü ratetba (definition)

\* Ao ocep nung **oratet** junga agütsütsü meranger.

**OLONG PAITEP # 6408**



**TIPIEN**

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

**LANGTSÜNGLEN**

- 1. \_ \_ \_ \_ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. \_ \_ \_ \_ kibur - (5)
- 13. Tebur tembar tsüngda jatepba - (4)

**OLONG PAITEP # 6407 TELANGZÜBA**


**TIPIEN :**

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

**Agüja aliba noksa nung meputepi**  
**aliba 10 bushiang**



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela**  
**Tasoba Anogo**



- 1. Tenüing : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Airtel-i Agartala nung 5G services tenzükogo**

**Agartala, January 23, 2023 (Agencies):** India nung telecommunications services provider tongtipang Bharti Airtel ajanga Hombarnü Agartala nung 5G services tenzükogo.

Shilem lemsar Airtel 5G Plus services agütsütsü aser company-i maneni network ulushitsü ta parnokoshi.

5 G-enabled devices amshiba customers-i sen talila meindoki Airtel 5G Plus network amshitsü ta company-isa metetdaksü.

Airtel 5G Plus network ya tang Tripura Secretariat, Chowmuhanu Bazar, Santipara, Durjoy Nagar, Jogendra Nagar, Amtola, East Champamura, Rani Bazar, Mohanpur,

Chandrapur, Indranagar, Sib Nagar, Kanchan Nagar, Khayerpur aser Madhya Charipara nung angur.

Airtel-i maneni Agartala yimti ajungalen services agütsütsü atema merangdar, ta company-isa ashi.

"Agartala nung Airtel 5G Plus tenzükba osang pelashishia metetdaksür. Agartala nung Airtel customers ajanga ultrafast networks amshitettsü aser 4G speeds dang nungi 20-30 agi tekaraba asütsü" ta Assam & North Eastern States, Bharti Airtel CEO Rajnish Verma-i ashi.

Airtel 5G Plus ajanga Airtel nung tang anguba services ajak

angutsü. Iba dak alia superfast High Definition video streaming, gaming, multiple chatting, instant uploading of photos aser talila angutsü.

Tesüiba küm ka tsüngda Airtel ajanga 5G indang tashi sayua aruogo.

India nung mezüingbuba live 5G network Hyderabad nung aser ano India nung mezüingbuba private 5G network Bengaluru kübok BOSCH facility nung Airtel-i tenzükba liasü.

Parnoki Mahindra & Mahindra den yaritepa Chakan manufacturing facility ya India nung mezüingbuba 5G enabled auto manufacturing unit kümdaksü.

**Meghalaya nung taoba NCP MLA Saleng Sangma-i Congress nung aden**

**Shillong, January 23, 2023 (Agencies):** Nationalist Congress Party (NCP) State President aser Gambegre MLA Saleng A Sangma-i January 23 nü Meghalaya Legislative Assembly nungi anener Congress nung denogo.

Hombar anüingdang Saleng-i Assembly Secretariat nung Commissioner & Secretary Andrew Simons nem MLA menden yutsüba shidi agütsü.

National People's Party (NPP)-in aniba Meghalaya Democratic Alliance (MDA) nung party 6-i yariteper aser iba nung NCP dena lir.

NCP aser MLA menden toktsüba sülen Saleng-i osangbener den jembidang MDA sorkar ketdangsubaren meshitak ta ashi.

"MDA ajanga ochimashi inyak aser iba nung nia dena lir. Ni ibaji meteta lir saka telemetba agiba nung onok maden" ta paisa ashi.

"NCP-i süoki aika meblem anungji ni parnok den külemi melitetsü kechiyong kü indang tangatetba melentsüla aser nübertem asoshi temelenshi kar bener arutsüla. Temelenshi bener arutsü atema ni tongtipang nisungtem nüngdaker aser sabang tuluba nüngdaker. Nii NCP nung adenba ajanga mesademer anungji iba jagi ni NCP aser NCP MLA ka ama anen" ta Saleng-isa ashi.

Congress MLA temi party toktsür tanga political party tem nung denogo anungji kechiba pai Congress nung adener ta osangbeneri asüngdangdang "Ni

nübor tenzüktsü atema Congress-i kü nem sabang tuluba agütsütsü" pai langzü.

"Nisung ajaki Congress toktsüogosa saka ni meyipa aor. Ni ya suwar ama bilema alitsü akok saka NCP dang nungi Congress-i kü nem sabang tuluba agütsütsü. Iba jagi ni Congress shimer kechiyong kü indang alizüingji nübertem asoshi lir. Ni nübertem asoshi langka ka inyaknür aser iba jagi ni sabang tulu mangu. Congress nungbo 'ni' masü 'asenok' asütsü" ta Saleng-isa ashi.

Garo Hills region nung Congress indang vote bank lir, ta paisa shisem.

Meghalaya nung February 27 assembly elections atema MLA 19 tashi anenogo aser iba ajanga assembly züngsem 60 nungi 41 dang kümogo.

**Dibrugarh nung ozüing alema abenba süng aika apu**



**Dibrugarh, January 23, 2023 (Agencies):** 18th Garhwal Rifles-i Honibarnü Arunachal Pradesh-i ozüing alema süng bener aoba truck gari aika apu.

Honibar aonung Namsang-Hukanjuri road nung truck gari 8 nung süngtem 62 bena aliba

apu. "Truck garitem ya Deomali anasa Rangla leni aodang apu. Parnoki bena aliba süngtem teimba ka Dibrugarh Forest Division nung Joypur range kübok Huguri nung atsüngba liasü" ta osang ka ajanga ashi. "Iba tesem nung

environmentalists kari trick garitem angu. Anogo 10-12 shi tejakdang truck garitemji Huguri arem nung atsüka yua liasü aser environmentalists-i forest department nem osang sangoktsü, saka department-i kecha meinyak" ta osang ajangasa ashi.

**GOVERNMENT OF NAGALAND**  
**DIRECTORATE OF HIGHER EDUCATION**  
**NAGALAND: KOHIMA**

NO.HED/SCHO/2022-23/

Dated, Kma, the Jan. 2023

**PRESS RELEASE**

It is hereby informed to the beneficiaries of (2021-22) Post Matric ST Scholarship Scheme who have not received their scholarships due to dormant/invalid/inactive bank account to produce their active bank account details and claim the scholarship within 90 days with effect from 21st Dec. 2022. Beneficiaries failing to claim within the stipulated time will lead to forfeiture of the scholarship and no further claim will be entertained. This is with the administrative approval of the Government.

Beneficiaries can send the photocopy of their active bank account details along with their Application ID/SI.No. in the beneficiary list by WhatsApp to 9863379247.

Sd/-  
**DIRECTOR**  
**HIGHER EDUCATION**  
**NAGALAND: KOHIMA.**

Mentioned below are names of the people from Yaongyimsen Village, which falls under the 22nd Arkakong constituency. The mentioned people had worked for NDPP candidate Imnatiba in the 2018 state legislative elections. However going forward they are pledging their allegiance/ support to Shri. Nuklutoshi for the current 2023 elections under the same constituency.

1. Takosangba	38. Rongsennungba
2. Akangla	39. Chubaienla
3. Imkongsangla	40. Toshimongba
4. Chubatula	41. Moazungba
5. Moasangla	42. Takulila
6. Sentikumla	43. Chubawati
7. Satemnungla	44. Jepdakyangla
8. Kumsangtozung	45. Imnakumla
9. Imlitongzuk	46. Temjensowa
10. Imtisangla	47. Imsu
11. Wangshila	48. Mayangtetla
12. Imnatila	49. Talikangzuk
13. Bendangnungsang	50. Temsukala
14. Imkongnungla	51. Lulenyangba
15. Imtientet	52. Sentitoshi
16. Imtisenla	53. Tianungsang
17. Talimeren	54. Sentirenla
18. Mongtilepzuk	55. Imenukshi
19. Imkongsanen	56. Takanungsang
20. Imnasenla	57. Nukshimenla
21. Tsuknungmenla	58. Moamenla
22. Tongpangwati	59. Limasanen
23. Watimenla	60. Aoyanger
24. Imkongtemjen	61. Shiluyanger
25. Bendangsunep	62. Lemjenchila
26. Sosangba	63. Sowamongba
27. Lanuwati	64. Kikattemjen
28. Opangkoka	65. Lipokyangla
29. Sopongla	66. Imkongwati
30. Imlimanen	67. Merentoshi
31. Imsuilenla	68. Limakum
32. Imtichiba	69. Takusunep
33. Nungsangtula	70. Imtiwapang
34. Limameren	71. Limameren
35. Akangienla	72. Imtimar
36. Ojenlepszuk	73. O. Matsung
37. Imkongtula	74. Takaienba
75. Imola	116. Karmen
76. Imtisunep	117. Omisangla
77. Imlinungsang	118. Imlitemsu
78. Yashila	119. Rilila
79. Imliakum	120. Matsungshiba
80. Ayangla	121. Rachel
81. Imnatemjen	122. Mulongnenba
82. Purnungla	123. Moainla
83. Aosenla	124. Temsumenla
84. Moatemjen	125. Imnajungla
85. Mayangtoshi	126. Mulongnenla
86. Yangerjungla	127. Temsujungla
87. Imnamalung	128. Sentichuba
88. Talimenla	129. Limainla
89. Walunir	130. Tsukhirenla
90. Tsungrosongba	131. Aotemjen
91. Talisowa	132. Taliangla
92. Marshiba	133. Rongsennungla
93. Senmoala	134. Tinulemba
94. Purtozung	135. Moasunep
95. Punarepla	136. Talijungla
96. Aolepten	137. Takatemsu
97. Malemtetba	138. Nungsangtula
98. Pangerla	139. Meyitizeng
99. Lanuilenba	140. Putisangla
100. Tajunchila	141. Tsuknungkala
101. Talitemjen	142. Tiakumzuk
102. Asangla	143. Imtisenla
103. Limatongit	144. Purienla
104. Temjentuba	145. Tinula
105. Ayangla	146. Sakutemjen
106. Tsutilepszuk	147. Sakupokla
107. Avini	
108. Bengdangonen	
109. Imbangtuba	
110. Imtilepshi	
111. Imtitenla	
112. Imlinungsang	
113. Imsukumla	
114. Talikaba	
115. Arenkala	

**YAONGYIMSEN VILLAGE**

**FORMER & PRESENT OFFICE BEARERS OF NDPP 22 ARKAKONG AC EXTENDING SUPPORT TO SHRI. NUKLUTOSHI.**

1. Imyangluba Lkr : Former Political Advisor to MLA 22 Arkakong AC
2. Marchiten : Former Treasurer NDPP Yaongyimsen Unit.
3. Imtiwati : Former President NDPP Yaongyimsen Unit
4. Imlikumzuk : Former Executive Convenor NDPP Yaongyimsen Unit
5. Lanuwati : Former Youth President NDPP Yaongyimsen Unit.
6. Imrongtuba : Former Executive Member NDPP Yaongyimsen Unit
7. Imsunukshi : Former Executive Member NDPP Yaongyimsen Unit
8. Kilangnukshi : GS. Youth Wing, 22 Arkakong AC NDPP (Present)
9. Sentitoshi : AGS NDPP Yaongyimsen Unit (Present)
10. Onenkaba : GS Youth Wing, NDPP Yaongyimsen Unit (Present)
11. Imlimoa : V.P. Youth Wing, NDPP Yaongyimsen Unit (Present)
12. Litemsangba : President, NDPP Liro Unit (Present)
13. Imtimar Imsong : General Secretary Liro Unit NDPP (Present)
14. Longertemjen : President, Youth Wing, NDPP Liro Unit (Present)
15. Takusunep : Executive Member, NDPP Liro Unit (Present)

**KELINGMEN VILLAGE**

**PRESENT OFFICE BEARERS & EXECUTIVE MEMBERS OF NDPP 22 ARKAKONG AC EXTENDING SUPPORT TO SHRI. NUKLUTOSHI**

1. Moatoshi Jamir, Secretary NDPP 22 Arkakong A/C
2. Nungsangmanen, Executive NDPP Kelingmen Unit
3. Sungjemmeren, Executive NDPP Kelingmen Unit
4. Limakumzuk, Executive NDPP Kelingmen Unit
5. Supongnukshi, Executive NDPP Kelingmen Unit.

**CHUCHUYIMLANG KAKETSHIR TELONGJEM**

**LUCKY DRAW RESULT**

*In Aid of LKM Tournament cum Conference*

**Dated : 23rd January 2023**

First Prize : Sl.No. 4318

Second Prize : Sl.No. 3650

Third Prize : 4762

Consolation Prize : Sl.No. 2592, 3868, 0073, 2350, 3753, 1458, 4267, 2570, 0704, 4797.

The winning prizes should be claimed within 15 days from the declaration of the result.

**Contact no. 9862441594**

**China-i par senso dang tekeraba nung Afghanistan yutsür aotsü ajungshir**

**Kabul, Luchii/December 14**

Iba sülen alimai taoba mapang (Agencies): Kabul yimti tiyong nung China nunger meyong hotel ka nung Islamic State telungpuri amakba sülen China-i Afghanistan nung par senso dang akok tashi tekeratiba nung linük yutsür ainshitsü shia liasü.

China-i iba sangdong agütsüba ya Afghanistan nung yimsü asür Taliban asoshi tetsükdaksü tuluka amai ajiteter, shirnoki küm ka tejakdang linük agiba sülen rongsenketzüng jenjang mejungi akumba anendaksütsü teimla nung bendangeri rongsen indoktsü lenmang bushir.

Taoba Hombar nikongdang Kabul Longan Hotel nung amakba atema Taliban tsükchir, Islamic State telungpur teloki tenüing agia liasü, kong lendong agütsür nisung asem asü aser kijiba nungi pongzüksü merangdang iba hotel nung anena alir ana yirua liasü.

Central Shar-e Naw neighbourhood nung story 10 atongtepa aliba ki nungyagi mokozi adoka aliba social media nung noksa prokshia liasü. Iba tesem nung alirtemi bomb apokba aser prangbong ola angashiba ashi.

Taliban sepaitem iba tesem yagi oa lendong atalokba tesemi aitba lenmang ajunga nokdanga liasü. Iba lendong ya ghonda ishika liasü aser iba sülen clean-up operation ka agi, ta Taliban-i shimba Kabul police tekolakba indang odongtar Khalid Zadrani ashi.

Iba lendong ya kanga taoksatsüka lir aser China taoksa jenjang nung lir, ta Chinese Foreign Ministry odongtar Wang Wenbin-i ashi.

Beijing-i iba lendong kanga junga bushisüngdangtsü akhanger aser Taliban sorkar dang Afghanistan nung China nunger, institutions aser project tem kumzüka ayutsü asoshi tapet mera agitsü ajungshir, ta Wang-i ashi. Kabul nung aliba Chinese Embassy ajanga par team ya iba lendong atalokba tesemi yoka lendong ajurur alirtem kumzüka, anepaluba aser anisüngzüka mapa nung yariteper, ta Wang-i ashi.

"Afghanistan nung tang iba tensa mechi Ministry of Foreign Affairs ajanga ano maneni Afghanistan nung China nunger aser institution tem dang akok tashi tekeraba nung Afghanistan yutsür ainshitsü ajungshir," ta pai ashi.

US aser NATO sepaitem küm 20 rarar Afghanistan nungi ainshiba mapang tatemleni arudang Taliban-i 2021 küm August ita linük linük amokbanga liasü.

Iba sülen alimai taoba mapang telungpur süa aliba telok nem teyari balala agütsübatem anen, shirnoki grade trok dak tema azüngtsü asoshi tetsürtem nem school tanaben lapoktsütsü aser minority rights kumzüka ayutsü densema tenangzüka balala raksa.

Taliban sorkari tawa sangdong kar agütsüba nung parnoki Islamic law mesüra Sharia ya mapa kuma inyaksü tebilemba lemsatepogo, aser parnoki 1990s tatemlen yimsü asüdang kasaji inyaka liasü. Nisung tepsetba aser kibong kumer alir aser makum alirtem tsüngta shi nung medemba nung Taliban court temi aija alirtem yimjak nung tepsetba aser süng agi azüka inyaka arur.

Sorkar teyari nung China nunger firm balalai Afghanistan nung metangshi aliba ali rongsen agitetsü asoshi maangka bushir aser item rongnung Mes Aynak mine ya densema lir, kong alima nung copper timtiba lir ta amanger.

October ita Taliban-i shimba sorkar odongtar Zabihullah Mujahid-i Afghanistan indang rongsenketzüng terenlok nung China ya tongti shilem lir, ta shia liasü. US sepaitem ainshiba sülen China-i Afghanistan nung tongti shilem agitsü tejangraba aliba sangdonga liasü aser tawa regional conference ka nung Chinese Foreign Minister Wang Yi-i United States dang Afghan nunger rongsen bendanglen soita aliba salatsü aser Taliban sorkar nem tenokdangba agüja aliba tembangtsü shia liasü.

Kabul hotel nung China nunger yiruba indang tejangja mesüra parnok Afghanistan nung kechi inyaka aliar memetet.

IS sangdong ka iba telungpuri amshiba Telegram channel nung agütsüba nung, diplomats temi teti amshiba aser "communist China" meyong hotel ya züngsem anati amak, ta shia liasü.

Parnoki hotel nung mapang jelia yuja aliba tapoktsü oset juli ana pokdaksü aser hotel nung mi senloktsü, ta ashi. Ajisüaka parnoki kuli tejangjaba magütsü.

Iba lendong nung asüba indang osang ya balala lir. Taliban ketdangtsür temi lendong agütsür nisung asem tepset ta ashir, saka IS-ibo par züngsem anati iba lendong nung shilem agi, ta ashir.

Taliban sorkar indang odongtar Mujahid-i ashiba agi, bendanger ana hotel kijiba nungi pongzüksü merangdang yiru.

Ajisüaka Kabul nung aliba Emergency Hospital ajanga Hombarnü tweet ka nung parnok dangi nisung 21 anir aru aser item rongnung par asem ya densema lir, ta ashi.

## MC Mary Kom lenisüba nung oversight committee inyaksangshitsü



**New Delhi, Aenjeti/January 23 (Agencies):** India tsürtem rongnungi nungtugu boxer MC Mary Kom lenisüba nung züngsem pongu agi kümtetba Oversight Committee inyaksangshitsü. Iba committee yagi Wrestling Federation of India (WFI) tir Brij Bhushan Sharan Singh anema sexual harassment ken o benoka aliba bushisüngdangtsü.

Sorkari shimba committee yagi taruba ita ka atema WFI anogoshia inyakyim achaayangtsü.

Iba committee nung tanga züngsemtemrongnung Olympic medallist wrestler Yogeshwar Dutt, taoba mapang badminton asayar aser Mission Olympic Cell züngsem Trupti Murgunde, ex-TOPS CEO Rajagopalan aser taoba SAI executive director - teams - Radhica Sreeman nung densema lir.

Iba committee shimba osang ya Sports Minister Anurag

Thakur-i Hombarnü sangdonga liasü.

Vinesh Phogat, Bajrang Punia, Sakshi Malik aser Ravi Dahiya nung amala nungtugu wrestler tem densema linük nung wrestler temi WFI aser tir anema longkak aitba sülen Thakur-i iba committee tentetsütsü asoshi Honibarnü teletetba agia liasü.

Hokolbar aonung Thakur den takok ngua sensak asema sülen wrestlers temi longkak aitba anena atatsü asoshi teletetba agi.

"WFI tir-i pa mapa minyaki atatsü aser WFI anogoshia inyakyim nung shilem magi-atatsü. WFI indang anogoshia inyakyim ya Oversight Committee achaayanga atatsü aser parnokisa WFI aser tir anema tashishiba benokba bushisüngdangtsü," ta Thakur-i ashi.

"Taruba ita ka tsüngda iba committee yagi ken o

bushisüngdangtsü aser telok ajak den sensak asema sülen parnok indang report benoktsü. Iba mapa matong tashi WFI indang anogoshia inyakyim iba committee yagi bena atatsü," ta pai shisem.

May Kom aser Yogeshwar naprongla ya WFI tekolakba anema ochi mashi aser sexual harassment ken o benoka aliba bushisüngdangtsü atema Indian Olympic Association (IOA) shimba committee nung densema lir.

Mary Kom aser Yogeshwar Dutt na dak alaka IOA panel nung archer Dola Banerjee aser Indian Weightlifting Federation (IWLFF) tir aser IOA treasurer Sahdev Yadav nungera densema lir.

IOA committee nung ano advocate Talish Ray aser Shlok Chandra na aser taoba mapang badminton asayar aser IOA joint secretary Alaknanda Ashok densema lir, shiba vice chairperson asütsü.

Longkak aitba wrestler tem rongnung Anshu Malik, Sangeeta Phogat aser Sonam Malik nung densema wrestler temi Bodhbarnü nungi tenzüka Jantar Mantar nung longkak ai tenzük aser parnoki WFI tekolakba mapa nungi agintsü khanga liasü.

Parnokisa FI loksatsü aser wrestler tem densema panel tasen shimtsü khanga liasü.

## Australian Open: Rublev & Djokovic na quarter-i iogo

**Aenjeti/January 23, 2023 (Agencies):** Hombarnü Australia Open tebur kija asaya nung fifth seed asayar Andrey Rublev-i match points ana tashi kümzüka Denmark nung asayar Holger Rune koker quarter-finals-i iogo.

Taoba mapang junior world number one asayar ana asaya nung Russia nung asayar yagi asaya akoktsü atema Rune-i serve asüba mapang pa indang service break süa 6-3, 3-6, 6-3, 4-6, 7-6 (11/9) agi koka liasü.

Iba takom anguba sülen arishi küm 25 tain asayar ya tang agi tanabenbuba Melbourne nung quarter-finals-i iogo aser Grand Slams quarter final tenetbuba tongtetogo.

Rublev ya tang world number six lir aser pai ATP asayamung 13 koker liaka tang tashi nung pai Grand Slam asaya nungbo quarter final adena asayadanga mali.

Pa quarter finals nung Novak Djokovic den asayatsü, shibai Alex De Minaur kokogo.

Hombarnü Rod Laver Arena nung Novak Djokovic aser Alex de Minaur na asaya ya Djokovic-i 6-2, 6-1, 6-2 agi ayong ayonga kokogo. Pa tang agi Australian Open nung 13benbuba quarterfinals-i iogo

aser taküm iba asayamung kokra pai Australia Open 10buba aser Grand Slam 22buba akoktsü.

Arishi küm 35 tain Djokovic ya tetsüng tabelenlen tera yiruba ajanga kanga sademabo masayateti arudar, ajisüka asaya nung pa yirur aliba kecha merprangtet aser asaya ghonda anaser minute 6 nung koka liasü. Pai iba asayamung kokra Rafael Nadal-i GS 22 koka otsü tasen yanglur aliba den kasa akümtsü.

Taküm asayatsü aliba quarter-final ya Djokovic asoshi Grand Slam nung quarter asaya 54buba asütsü aser pa Federer (58) sülen tanabuba jenjang nung lir.

Kasa asayamung tarep temeyoktep asaya nung India nung tarep Sania Mirza aser Rohan Bopanna nati Hombarnü asaya koka quarterfinals tongtetogo. Tenati Uruguay tsür Ariel Behar aser Japan nung asayar Makoto Ninomiya na koka liasü.

Mirza aser Bopanna nati iba asaya ya 6-4, 7-6 (11-9) agi straight sets nung koka liasü.

Mirza aser Bopanna na quarter final nung latvia tsür Jelena Ostapenko aser Spain nung asayar Vega Hernandez na den asayatsü.

## BILEMDANGANG

"Anogoshia langka tasen angazüksü merangang."



Office of the  
**CHIEF ELECTORAL OFFICER**  
Nagaland, Kohima

State Level Programme for Celebration of  
**13<sup>th</sup> NATIONAL VOTERS DAY, 2023**

Theme: "Nothing like voting, I vote for sure"

Date: 25<sup>th</sup> January, 2023 | Time: 1:00 PM

Venue: Hotel Japfu (Dzükou Hall), Kohima

Comper: Ms. ILIHO KIHU

### ORDER OF PROGRAMME

Welcome Address	: Shri Ruokuovituo Khezhi Addl. Chief Electoral Officer, Nagaland
Perspective and background	: Shri Shanavas C, IAS. Deputy Commissioner & District Election Officer, Kohima
Presenting the Message of the Chief Election Commissioner of India	:
Special number "My Vote is My Future"	: Mr. Nyensang Oung & Mr. Visheto Kasho Mount Hermon Hr. Sec. School, Kohima Participants in the ECI's National Voters Awareness Contest, 2022

Presentation of Awards :

Felicitations of Village Councils for resolving for a free and fair election :

- Shri. Kakheho Zhimo**  
Chairman, Nihokhu Village Council, Niuland
- Shri. Viletuo Pienyu**  
Chairman, Thizama Village Council, Kohima
- Shri. Ape Yavio**  
Chairman, Kiruphema Basa Village Council, Kohima

Messages from First Time Voters :

Solo song presentation by Person with Disability (PwD) : **Shri Mughato Achumi**

Administering of NVD Pledge and Speech : **Shri V. SHASHANK SHEKHAR, IAS.**  
Chief Electoral Officer, Nagaland

Launch of "Main Bharat Hoon" song

Vote of thanks : **Smti. Sharon Longchari, NCS**  
Joint Chief Electoral Officer, Nagaland

Closing : **Playing of National Anthem**

**Group photograph with Awardees & First Time Voters**

Program can be viewed online at <http://youtu.be/334KH45wfkU>